

[www.BibleForChildren.org](http://www.BibleForChildren.org)

# Mateu 1




Tawamhã a'amo imropã hã Izabéhé ãma oto si'utõrĩ  
wamhã, iwasã na hã, 'Re ihâimana u'âsi mono ma we  
duré satõ ti'ai u, Gabriéu hã, hâiwa ãma tãma  
iromhuri'wa hã. Nazaré u, ma we satõ, pi'õi ubuni ma,  
te te duré sadawa wasu'u da. Galiléa ãma, Nazaré hã.  
Pi'õ nhisi hã, Maria na isisi hã. Ta hã, azarudu.

Niwapsi, Zuzéhé me te za sina timro  
zahuré, apito Dawihi nhihudu me.




Tawamhã te duré tãma tinha, hãiwa  
ãma romhuri'wa hã: — Maria, aipahi  
tõ. 'Re aimorĩ wẽ na, ma tô 'Re  
ihãimana u'ãsi mono hã aiwẽsã.  
Tahawa, te za aiwasã. Ai'ra te  
za aibã na aima podo. Ai'ra  
hã poto wapsi, Zezusi na te  
za isisi. Ai'ra hã prédu wapsi,  
te za dama pire na hã 're mo. 'Re  
ihãimana u'ãsi mono 'ra na isisi hã  
za, danhipai u ipire uptabi 'ra na.



Ta hã uburé Danhib'apito uptabi hã  
te za ti'ra ma pisutu, tihi'rata ne,  
si'apito da, Dawihi ne.

Danhib'apito 're morĩ wa, te za  
Zacoho nhihudu sidâpâsi,  
Isib'apito na hã tãma 're  
hâimana u'âsi za'ra, õne  
u'â. Te za ãma 're sib'a'uwẽ  
u'âsi za'ra.



Tawamhã asa te tãma tinha, Maria  
hã, ãne: — E niha wa za ãra, aibã te  
sa'rese õ nherẽ. Tawamhã asa te  
duré tãma tinha, ãne: — 'Re  
ihãimana u'ãsi mono, te za we  
aipawapto, tiwaihu'u pese  
na aiwasã da, ai'ra da.

Taha da, te za  
Tipẽ'ẽzani hã we  
atẽme satõ.

Tahawa, 'Re  
ihãimana u'ãsi

mono 'ra na, te  
za ai'ra hã  
da te 're sisi za'ra.



Tawamhã bådã umro na ãma si'utõrĩ pari,  
ma tô Maria hã sima robza'ra pese, tina  
waptéb u morĩ da, Izabéhé u. Tawamhã  
Zudéa na danhipti'a  
nho'õmo nhisi u, te  
itẽme mo si'aba're na,  
'ri ahã sa'a na 're  
ihãimana mono u.  
Tawamhã ma tô oto  
wi, Zacariaha  
nhorõwa u.




'Ri para u sébré wamhã, ma tô tina wapté hã sawi. Tawamhã Izabé hã, Maria te te isawizém na te te wapari wamhã, ma tô ai'uté hã idi'i 'remhã 're sirési.


Tawamhã ma tô ti'ra wapté ma rowasu'u, Izabé hã.



'Re ihâimana u'âsi mono pē'ēzani te te  
tāma iwaihu'uzéb zarina, rowē te, te mreme  
'rāihâ na tāma rowasu'u, āne: — A hã pi'õ  
norĩ nhipai u, ma tô aima  
tinhopru, iwē uptabi na,  
'Re ihâimana u'âsi  
mono hã. Ai'ra ma  
zama, te za tinhopru,  
iwē uptabi na, ai'uté  
norĩ nhipai u.



Tawamhã ãne Zezu Cristuhu potozé hã: Maria  
hã Zezusi, ãma ina da hã ma  
tô sima ropisutu zahuré  
Zuzéhé me, sina mro  
zahuré da. Tane nherẽ,  
sina mro zahuré õ ré,  
ma tô 'Re ihâimana  
u'âsi mono pê'ẽzani  
na tiwasã Maria hã,  
te te sa'rese õ nherẽ.  
Tawamhã aibã hã Mariaha  
ãma imro da hã 're morĩ  
wẽ di, Zuzé na isisi hã.



Ta hã marĩ iwẽ si te  
te 're 'manharĩ u'âsi.  
Tahawa, ma tõe sima  
rosa'rata, za ãma  
imro da na ropisudu  
pi'uriwi te te siwi  
ipari na hã, duré  
danho'a iwasété na  
te te ãma hiri wa, da  
te dasiwi waihu'u  
za'ra tõe da.



Tawamhã ãne na te te sima rosa'rata wamhã, ma tô hâiwa hawi Wanhib'apito ma romhuri'wa hã tâma sihâi'ré, sôtõ 'rowim na. ãne te taha wamhã tâma tinha: — Zuzé, Dawihi nhihudu, asina aihâtâ'â tõe, Mariaha ãma aimro tõe da hã. Ta hã ma tô tiwasã, 'Re ihâimana u'âsi mono pê'êzani na.



I'ra hã 'watébrémi na te za tãma podo. Tawamhã  
Zezusi na te za isisi. Danho'reptui'wa te wasu'u, isisi  
hã. Taha si te za tinhib'a'uwẽ hã te  
te 're anho'reptu, iwasété hawi, duré  
'Re ihâimana u'âsi mono te te 're  
idahâ za'ra mono zém hawi.



Tawamhã Zuzé hã utu wamhã, hãiwã hawi  
Wanhib'apito ma romhuri'wa te te tãma iwaihu'uzéb  
zarina, ma tô ãma timro oto, Mariaha  
ãma, awa'awi. Tane nherẽ, Zuzé hã te  
te ãma sima rosa'rata upai õ di, a'ã  
ãma panomro da hã Mariaha ãma, i'ra  
hã tãma waptã'ã õ ré. Taré te iré pibui  
wẽ. Tawamhã i'ra tãma waptã'ã  
wamhã, Zuzé hã ma  
tô sisi, Zezusi  
na.



Tawamhã Zuwã hã waptã'ã wamhã, ma tô Roma ãma danhib'apito Agustu hã dama ti'ru, uburé danhisi na, da te daza'rata za'ra da.

Dahâiba te te waihu'u da, ma tô dama ti'ru, daza'ratazé hã.

Daza'ru



mono bâ danhib'apito uptabi, apito Agustu hã.



Tawamhã ma tô dahâiba za'rata na sãna'rata za'ra ni,  
Sireniu hã, isadawa para te te dama 're roti mono ré,  
Siria na ti'a nhisi ãma.

Tahawa, dahi'rata za'ru u,  
ma tô 're danomro  
daro mono bâ,  
danhisi na da



te 're daza'rata za'ra mono da.



Tahawa, Zuzé hã te mo, tihi'rata za'ru u. Apito Dawi hã  
ihi'rata wa, tihi'rata za'ru u te mo, Belẽ u. Zudéa ãma,  
Belẽ hã. Nazaré hawi te  
mo, Belẽ u. Galiléa ãma,  
Nazaré hã. Timro  
me, te tineb  
zahuré



Mariaha me, isisi na, da  
te dame rob'ui'ééré zahuré  
da. Wasã ré, te saprõ.



Tawamhã Belẽ u, ma tũ  
aimasisi zahuré. Belẽ  
ãma simasisi ré, ma tũ  
iwasã hã ãma sépu, te  
te ãma irosõwada  
'rada hã.



Tawamhã ma tô tãma  
waptãrã, 'watébrémi na.  
Waptã'ã wamhã,  
zazahã pa na ma tô  
ubu, ina hã.



Te te ubu pari, ma tō tihi, nomro da, danhimizama hã  
're isaihuri mono zéb 're, wede're wa. 'Re  
idanhimi'wara mono zéb ãma  
hã, 'ri 're baba hã tãma  
'maiãimana  
zahuré ã wa,  
ma tame  
tihi.



Tamemhã pone'ërebâ 'madâ'â'wa norĩ hã ma tô mara  
bâre asimro, Belẽ 'rata. Tinhimizama te 'madâ'â za'ra  
a'ubuni wimhã, rom na. Tawamhã


tinhimizama te te 'madâ'â

za'ra ré,  
misi, ma  
tãma sihâi're  
za'ra, hãiwa  
hawimhã

uburé Danhib'apito  
ma romhuri'wa hã.



Tawamhã aibã norĩ 'rata, rowa'a ma tô tãma rowa'a  
za'ra. Rowa'a sa'ětẽ di, 'Re ihâimana u'âsi mono  
hawimhã. Tawamhã isisiwi rowa'a  
za'ra wamhã, ma tô tãma  
tipahi za'ra.



Tawamhã hãiwã ãma romhuri'wa, te tãma nharĩ za'ra,  
ãne: — Aipahi za'ra wa'aba tõi. Wa hã wa wei mo,  
rowasu'uwẽ te aima wasu'u za'ra

wa'aba da. Rowasu'uwẽ

hã da te  
wapari za'ra  
wamhã, dama  
\*re rowẽ  
uptabi za'ra

mono di za. ã bõtã na  
ma tõi waptãrã Belẽ  
ãma, danho'reptui'wa  
da hã, Dawihi za'rui ãma.



Ta hã 'Re ihâimana u'âsi mono te te ipisudu,  
Danho'reptui'wa da, uburé Danhib'apito da hã.

Iwaptã'ãzé hã tô sena na waihu'u  
za'ra wa'aba da, te za


ai'uté hã  
isabu za'ra  
wa'wa.

Wede're wa,  
te nomro,

zazahâ pa na,  
ubu ré.



Tawamhã awa'awi ma tô tãma sihâi'ré za'ra  
romhuri'wa norĩ hã, ahâ uptabi na, hãiwa  
hawimhã.



'Re ihâimana u'âsi mono âma te tiwata za'ra, âne:

— 'Re ihâimana u'âsi mono hã sôprub  
di, hâiwa âma 're isãmra mono hã.



Ma tô sima dawẽ, iwẽ hã te te dama 're anhomri  
mono da, rowẽ na 're danomro mono da  
oto, ti'ai ãma hã.



Tawamhã romhuri'wa norĩ hã hãiwa u apã si'aba'réi  
wamhã, pone'ẽrebã 'madã'ã'wa norĩ hã ma tô sima  
nharĩ za'ra: — Oto wasi'aba'réi wa'aba Belẽ u,  
Wanhib'apito, marĩ te te wama iwaihu'u za'ra hã wa  
te sabu za'ra da.



Tawamhã si'aba'ré na te oto ai'aba'ré,  
Belẽ u. Tame ma tô sabu za'ra Maria hã,  
Zuzéhé me. Ai'uté zama, ma duré sabu  
za'ra. Danhimizama sazé wa, wede're  
wa, te nomro.



Te te 'madâ'â za'ra wamhã, ma tô  
Zuzé norĩ ma rowasu'u za'ra, hãywa  
hawi romhuri'wa norĩ nhimirowasu'u  
na, ai'uté ãma hã.




Tawamhã Zezusi hã  
ma tô podo, Belẽ na  
'ri nho'õmo nhisi  
ãma, Zudéa na  
danhipti'a  
nho'õmo nhisi  
ãma.

Apito Erodi hã, Izaraéu nhihudu  
norĩ te te 're 'madâ'â za'ra mono  
ré, ma waptãrã.




Waptã'ã parip si,  
ma tô wasi na  
romnhoré'wa norĩ hã  
aihutu Zeruzalẽ u,  
bâtâ pusizém  
hawi,



rowaihu'u pese 'wa norĩ hã.  
Tawamhã ta norĩ hã te sô anharĩ  
za'ra, ãne Zezusihi zô hã:  
— E mahãta 'watébrémi, zudeu  
norĩ nhib'apito da, ipodo hã.






Wasi, wa norĩ hã wa tô 'madâ'â  
za'ra ni, bātâ pusizém niwĩmhã,  
zudeu norĩ nhib'apito da, ipotozé  
te te iwasu'u hã. Tahawa, wa tô  
we ai'aba'ré ni, ãma wawata  
za'ra da.



Tawamhã Erodi ma tô sô  
tihârâ za'ra, bôtâ pusizém  
hawi isihutu norĩ zô,  
pi'uriwi te te sadanhaĩ  
za'ra da, ta norĩ hã ãne:  
— E mahãna ma tô wasi  
hã watobro. Te te  
sadanhaĩ za'ra pari, ma tô  
tãma rob'ru za'ra, Belẽ u  
si'aba'ré da.



Ãne te duré tãma rob'ru za'ra:  
— Mo oto ai'aba'rúi wa'aba,  
'watébrémi zô asinhaĩ  
pese za'ra wa'aba da.  
Sõpētē za'ra wa'aba  
wamhã, ma'ãpé apã we  
asiwi ãpo're pu'u aba za, te  
waihu'u da, wa hã duré  
itēmemhã ãmorĩ da, ãma  
ãwata da, ãzama. — Ãne ma  
tô tãma waihu'u  
za'ra, apito  
Erodi hã.



Tawamhã apito mreme te te wapari za'ra parimhã, te  
oto robzabui'wa norĩ hã ai'aba'ré, Belẽ u. Tawamhã  
bãdãdi na si'aba'rúi ré, ma tô wasi hã  
'madã'ã za'ra, tô õ tirob ãma  
ré te te i'madã'ã za'ra hã. Ta  
hã te isõwab za'ra hã mo.

Tawamhã  
'watébrémi  
isãmrazém nho'õmoi  
baba ma tô oto  
wasi hã mazazã.



Tawamhã 'ri para u ma tô asisi. Sisisi wamhã, ma tô sabu za'ra 'watébrémi hã, ina iré sãmra ré tipa, Maria hã. Tawamhã hi'rãtitõ ma tô asmiro, ãma wata za'ra da. Taha pari, ma tô 'ridawa za'ra, tinhimiro'wapézé te te i'wasari zô, te te ãma sawi za'ra da.



Tawamhã taha na ma tô ãma sawi za'ra, tinhoprub  
za'ra zém na; ãtẽ waipo pré oru hã, duré wedewati

isadaze hã, duré wedewati isadaze

si'u'ẽne hã. Taha na ma tô tãma

tinhoprub za'ra. Tawamhã

rosawẽrẽ na ma tô 'Re ihâimana

u'âsi mono hã tãma

waihu'u za'ra, bõtã

pusizém hawi isihutu

noĩ ma, apã si'aba'rẽ

tõ da, Erodihi u.

Tahawa, te


bãdãdi amo

amo na

apã hã


ai'aba'rẽ,

tirob u.




Tawamhã aibã norĩ si'aba're  
za'u si, ma tô hãiwa hawi  
Wanhib'apito ma romhuri'wa  
hã Zuzéhé ma siháire, sõtõ  
'rowi. Taha wamhã, te ãne  
tãma rowasu'u: — Apito  
Erodi hã ma tô dama  
rob'ru, ai'uté zõ  
danhopré mono da,  
isadawa

para da te wĩĩ da.



Tahawa, te za oto ai'u. Ai'uté  
hã, ma'ãpé duré sa'ra na. Ina  
hã iré saprõni da Ezitu u, tame  
a'â iré aimasisi aba da, dawi.  
Tawamhã apâ we i'ane  
wa'aba zéb da hã, wa hã  
te aima iwaihu'uzéb zô  
si, te za a'â duré asina  
asimipa za. — ãne  
ma tãma



waihu'u, hãiwa  
ãma romhuri'wa hã.



Tawamhã Zuzé ma tô udu.  
Utu wamhã, awa'awi ma tô  
ai'utére hã sa'ra. Ina hã ma tô  
iré saprõ bara na, Ezitu u.  
Tawamhã tame te oto iré  
aimasisi zahuré, apito  
Erodi hã idâ'âzéb u.




Ãne ma tÔ tiromhâiba, duréihã  
'Re ihâimana u'âsi mono,  
tizadawa 'mahârâ'wai ma, te  
te iwaihu'uzém na te te sina  
uwaimrami da. Ãne ma tÔ  
tãma waihu'u siro: "Wa  
hã ãra, wa satõ, Ezitu  
hawi morĩ da." Ãne  
duréihã 'Re ihâimana  
u'âsi mono

mreme, ti'ra ãma hã.




Tawamhã apito Erodi aibã  
norĩ, bātã pusizém hawi we  
isi'aba'ré norĩ pi'uriwi tiwi  
isi'aba'ré na te te ãma  
rowaihu'u za'ra wa, ma tō  
ab'ruí pese.



Sib'ruí wa, tãma da'wapéi'wa  
norĩ hã ma tô satõrĩ za'ra Belẽ  
u, 'watébrémi zô si'aba're  
da, uburé te te dawi uprosi  
mono da, maparane ãma  
iwahu mono õ hã, Belẽ ãma 're  
idahãimana za'ra mono norĩ 'ra


hã, duré  
Belẽ  
'rata  
're




idahãimana za'ra  
mono norĩ 'ra zama.



Aibâ norĩ hã wasi te te i'madâ'â  
za'ra zém na te te tãma  
iwaihu'u za'ra zéb zarina,  
ma tô apito Erodi hã ãne  
'manha.





Tawamhã apito Erodi dâ'â  
parimhã, ma tô hâiwa ãma  
Wanhib'apito ma romhuri'wa  
hã Zuzéhé ma sihâi'ré, sõtõ  
'rowi, Ezitu ãma sãmra ré.

Ãne te tãma tinha:

— Oto ai'utu,  
'watébrémi hã subzari  
aba da. Ina hã iré  
saprõni,

Izaraéu nhihudu norĩ  
nhipti'ai u.



Aibâ norĩ hã 'watébrémi  
te te aré siwi wĩĩ da, sô  
si'aba're norĩ hã ma tô  
tidâ'â za'ra.



Tane nherẽ, ma tô wapa Aterazu, apito Erodihi 'ra  
wasu'u hã, timama  
nhowa're're isébré na  
hã Zudéa ãma te te  
're ida'ab'madâ'â  
mono da  
hã.



Tahawa, pahi di, tame  
iré 're ihâimana zahuré mono da hã.





Tawamhã sõtõ 'rowi ma tô tãma waihu'u na sahu,  
hãiwa ãma 'Re  
ihâimana u'âsi mono  
ma romhuri'wa hã,  
Zuzéhé ma, Zudéa  
u neb



zahuré tõ da, Galiléa  
na danhipti'a nho'õmo nhisi u si neb  
da. Tahawa, ma tô tamomop si tineb  
zahuré, Zuzé norĩ hã. Tame te oto 're simasisi  
zahuré, Nazaré na 'ri wa'õtõ nhisi ãma.




Ãne iromhâimanazé hã, duréihã 'Re ihâimana u'âsi  
mono zadawa 'mahârâ  
'rata 'wa norĩ nhimi'ui'ééré  
hã te te ãma uwaimrami  
da. Ãne duréihã  
iwasu'u  
na



rob'ui'ééré 'rada  
hã: “Ta hã Nazaré ãma  
're isãmra mono na te za oto da te 're  
sisi za'ra.” Ãne ma tô waihu'u siromo za'ra, za da  
te dasima 're iwasu'u za'ra mono zéb da na hã.



'Re ihâimana  
u'âsi mono ma, tãma dazawi pese uptabi  
wa, ma tô ti'ra hã misi nherẽ, we tisõ,  
dazada dâ'â da. Tawamhã i'ra, da te  
dasina 're umnhasi za'ra mono wamhã,  
dadâ'â ãna te za hâiwa ãma i'rata  
're dasi'ubumroi u'âsi.  
Ropipa ãma isiti 're  
dasi'ubumroi  
mono õ  
di za.



## Roma 3:23

Uburé te dawasété na a'uwẽ mono bâ 're danomro. Tahawa, te 'Re ihâimana u'âsi mono 're imorĩ wẽ uptabi zém nhiti 're dahâimana za'ra, 'râwi da te dasina 're tété waihu'u za'ra mono ãna.

## Roma 6:23

Dawasété na si 're idanomro mono zé wa'rãmi, te za dadâ'â u'âsi ne 're dahâimana za'ra dapẽ'ẽ 're, 'Re ihâimana u'âsi mono nhiti. Wanhíb'apito Cristu Zezusihi ãma si 're danomro mono wapsi, te za 'Re ihâimana u'âsi mono hã sôpru wa, te te dama 're apisutu, i'rata 're idahâimana u'âsi za'ra mono zéb da hã, asa tãma 're idasiwa'âbâ za'ra mono zéb zô, sina 're simnhasi mono ãna.



## Hebreu 9:27

Misi haré te za aihĩni 're dadâ'â za'ra. Taha parip si te za 'Re ihâimana u'âsi mono hã niwapsi da'awaihu'u, dawẽ na duré dawasété na zama, taha zarina te te oto dama 're arowairébé mono da hã.

## Éfézu 2:8,9

'Re ihâimana u'âsi mono te te 're asawi pese za'ra wa'aba mono zéb zarina, ma tô asõ'reptu za'ra wa'wa, Wa'anho'reptui'wa hã asina 're i'umnhasi za'ra wa'aba mono zéb zarina. Asi'uihâ na 're asisõ'reptui waihu'u za'ra wa'aba mono õ di. Sõpru wa, ma tô Wamama hã aima ãma uwaimrami za'ra wa'wa, asõ'reptu za'ra wa'aba zém na hã. Marĩ hã ahâ na 're 'manharĩ wẽ za'ra wa'aba mono nherẽ, taha zarina te te 're asõ'reptu za'ra wa'aba mono õ di za 'Re ihâimana u'âsi mono hã, 'râwi asi'ãma wa'aba 're ai'maiwata aba mono tõi da, asi'uihâ na asi'manho'reptui wa'aba mono dai õ wa.



## Roma 10:9,10

Zezusi hã Asib'apito uptabi na, asadawa na danho'a 're sisi za'ra wa'aba mono wamhã, duré 'râwi aipẽ'ẽ 're, 'Re ihâimana u'âsi mono, Zezusi te te ihâiwa'utuzém na, 're sazei pese za'ra wa'aba mono wamhã, tawapsi te za te te 're asõ'reptu za'ra wa'wa, 'Re ihâimana u'âsi mono hã. Zezusi hã wapẽ'ẽ 're, wa te wasina 're i'umnhasi za'ra mono zém na, 'Re ihâimana u'âsi mono hã te te 're iwa'awěsãmri mono zé hã. Zezusi hã Wanhíb'apito na danho'a, wa te dama 're isisi za'ra mono zém na, 'Re ihâimana u'âsi mono te te 're iwa'anho'reptui mono zé hã.



## Zuwã 3:16,17

'Re ihâimana u'âsi mono ma, tãma dazawi pese uptabi wa, ma tô ti'ra hã misi nherẽ, we tisõ, dazada dâ'â da. Tawamhã i'ra, da te dasina 're umnhasi za'ra mono wamhã, dadâ'â ãna te za hâiwa ãma i'rata 're dasi'ubumroi u'âsi. Ropipa ãma isiti 're dasi'ubumroi mono õ di za. 'Re ihâimana u'âsi mono ma tô ti'ra hã we satõ ti'ai u, te te 're da'anho'reptui mono da. Te te 're da'ahâ za'ra mono da, we te te satõrĩ õ di.



## 1 Zuwã 5:11-13

E niha 'Re ihâimana u'âsi mono hã, ti'ra te te dama 're iwaihu'u mono zé hã. Ta hã ma tô te te wama 're apisutu, i'ra wazada idâ'âzém na ãma 're iwanomro u'âsi mono zéb da hã. Ni'wam norĩ hã 'Re ihâimana u'âsi mono 'ra siré, 'râwi 're nomro mono wamhã, ta norĩ hã te za dâ'â ãna 're hâimana u'âsi za'ra, 'Re ihâimana u'âsi mono 'rata. Tane nherẽ, ni'wam norĩ hã 'Re ihâimana u'âsi mono 'ra siré 're nomro mono õ wamhã, ta norĩ hã i'rata dâ'â ãna 're hâimana u'âsi za'ra mono õ di za. E marĩ da, wa ãne aima rob'ui'ééré za'ra wa'wa, 'Re ihâimana u'âsi mono 'ra, asina 're i'umnhasi za'ra wa'aba mono norĩ ma. Aipẽ'ẽ 're, atâ'â ãna 're anomro u'âsi aba mono zém na sena na asina waihu'u pese za'ra wa'aba da, wa ãne aima rob'ui'ééré za'ra wa'wa.



Mateu 1-2; Luke 1-2

Storyline by: Edward D. Hughes

Illustrated by: M. Maillot  
and Alastair Paterson

Adapted by: E. Frischbutter, Sarah S.

Xavabte Bible (xav) © 2011, Wycliffe Bible  
Translators, Inc. All rights reserved.

<https://www.bible.com/bible/683/GEN.1.XAVBP>

<https://live.bible.is/bible/XAVTBL/MAT/1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

